



partii naleraq

30. april 2019

UPA2019/63

Sinerissap qanittuani aalisariutit isaterneqarneranni akileraaruteqaataajunnaarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut.
(Inatsisartunut ilaasortaq Jens Napâtôk', Partii Naleraq)

Inatsisartunut ilaasortaq Jens Napaattoq Partii Naleraq, siunnersuuteqarpoq Sinerissap qanittuani aalisariutit isaterneqarneranni akileraaruteqaataajunnaarnissaannik inatsisartut aalajangiiffigisassaattut siunnersuuteqarluni tamannalu oqaaseqarfīgissavarput.

Nunatsinni oqaluttuarisaaneq qiviaraanni aalisartorsuit nunatta ineriartorneranni sulerujussuarnermikkut inuussutissarsiornikkut suliffissaqartitsinikkut aningaasarsiornikkullu inuttut namminneq pilliuteqarujussuarlutik nunatsinni siuarsaasimanerat eqqaallugu pissutissaqarpugut qutsavigissallugit, naak aalisakkat akisigut akiluttugaarujussuarsimagaluarlutik annertoarujussuarmik inuiaqatigiinni alloriartitsinikummata.

Nunatsinni aalisarnermi inuussutissarsiutillit aalisartorpassuit ukiuni makkunani aalisarnikkut periarfissaasa pitsanngorsartuarnissaat tamatsinnut pingaarluinnartuusoq oqaatigerusupparput.

Nunatsinni sinerissami aalisartut pisussaaffeqarput pinngitsooratik aalisagartaminnik nunami suliffissuarnut tulaassisussaataitaallutik, aki qanorluunniit ikkaluarpat qaffasippat appasippalluunniit apeqqaatinnagit.

Aalisartut taamatut inissisimanermikkut pitsaanerpaamik siunissaminut inissinneq ajorput, pingaartumik tunisassiassat ukiorpassuarni taamak akit appasitsigisut atorlugit ingerlanerminni, aammalu orsussat sillimmasiinerit, minnerunngitsumillu aserfallaatsaaliinerit eqqarsaatigalugit. Taamak aalisakkanut akit appasitsigisut atorlugit aalisarnerup imminut akilersinaanera killeqartarluni, tamannalu annertunerpaamik aalisariutillip nammattarpaa, nunami tulaassisussaataitaneq atortillugu, tassalu nunami suliffissaqartitsigami "pillarneqaatigisarpaa".

Tassami pinngitsaaliissuumik nunamut aalisagartaminik tulaassisussaataitaavoq, nunami suliffissaqartitsinissaq qulakkeerneqassammat, tamannalu piumasaqaat aalisartut kisimiilluni nammattarpaa, siunissaminut aningaasarsiornunissaminut imminullu akilersinnaanerusumik ingerlanissaminut mattunneqarsimalluni.

Taamaattumik takornartaanngilaq ilaatigut aalisariutaatillit amerlasuut katataasarmata aalisariutip aserfallatsaalinnissaa eqqarsaatigalugu. Ukiuni makkunani aalisariutit imminut akilersinnaanngitsut assullu nutaanngilillutik aserfallassimasorujussuit sinerissami aalisariutigineqarput, tamakkulu

akilersinnaanerusunik taarserneqassappata taava ullutsinnut naleqquttunik aalisariuteqarnissaaq saneqqunneqarsinnaanngilaq, nutarterinissarlu aalisartumut alloriarfiussappat nutaamik imminullu akilisinnaasumik aalisariutitaanissaaq aalisartumut kissaatiginarnerujussuusarpoq.

Aalisariutitoqqat sukkanerusumik atorunnaarsinnissaanut politikikkut aqputissiiussinissaaq ullumikkornit pitsaanerujussuarmik tunngavissinneqartariaqarpoq. Ajornartorsiutit aalisariutit nutaanngitsut eqqarsaatigalugit ajornartorsiut asuli kinguartitserneqartarpoq allamut angallatit nutanngilluinnartut tunisaqattaarlugit pisoqaleraangat.

Nutaamillu piginnittunngortumut ajornartorsiut nutaaq tutsinneqartarpoq, piginnittumut nutaamut aalisariut pisoqaaq nammatassanngortinneqartarluni, taamatullu ingerlaaseqarneq unittariaqarpoq imminnut akilersinnaanngitsut aalisariutigineqarsinnaanngimmata piaartumillu aserorteqartarnissaat angusariaqalerluni.

Taamaattumik aalisariutit nutaanngitsut isaterneranni politikikkut aporfeqannginnerusumik aaqqissuussisoqarnissaaq aaqqittariaqarpoq, tassalu isaterisitsinermik akileraarutinut akiligassiisernerup atorunnaarsinneqarnissaaq siunnersuuteqartup Jens Napaattooq Partii Naleraq tunngavilersutai isumaqatigigippat oqaatigissavarput.

Ilaatigut aalisartunut utoqqanngorsimasunut aamma nappaammik eqqorneqarsimasunut assut pitsaanngitsumik akiligassaqaalertarneq sunniuttarmat, ilaatigut akileraarutinut akiitsoqalernermit kinguneqartarluni. tamannalu inunnut pineqartunut artuukiisarmat, ilaatigullu ilaqaatannut sunniuttarmat aaqqittariaqarpoq.

Taamatut oqaaseqarluta siunnersuut tamakkiisumik taperserlugu Aalisarnermut ataatsimiititaliami suliarineqarnissaaq innersuussutigaarput.

Hans Enoksen